

**Talamdan sa
Mga Mensahe alang sa Full-time Training
sa Spring Term sa 2023**

**LINANGKOB NGA HISGOTANAN:
ANG MAHINUNGDANONG MGA PUNTO SA KAMATUORAN SA MGA SULAT NI PABLO**

Mensahe 11

**Mga Piniling Sudlanan nga Kasudlan sa Dios ug Organicong Mausa sa Dios
aron Mahimong Organismo Niya nga Magpadayag Niya sa Pagka-tawo**

Basahong Kasulatan: Gen. 2:7; Prov. 20:27; 1 Tes. 5:23;
Rom. 9:21, 23; Buh. 9:15; 2 Cor. 4:6-7 “

- I. Ang unang lakang sa paagi sa Dios sa pagtuman sa Iyang walay kataposang pamatigayon paglalang man sa tawo ingon nga sudlanang kasudlan Niya nga kinabuhi—“Giporma ni Jehova nga Dios ang tawo gikan sa abog sa yuta ug ginhawaan ang mga buho sa iyang ilong sa gininhawa sa kinabuhi, ug nahimong kalag nga buhi ang tawo”—Gen. 2:7:**
- A. Tulo-usa ang Dios, ug gilalang Niya ang tawo sa Iyang dagway aron mahimong tawo nga may tulo ka bahin—“espiritu ug kalag ug lawas”—1 Tes. 5:23:
1. Giporma sa Dios ang lawas sa tawo gamit ang abog sa yuta aron maanaay lawas ang tawo nga pagpadayag niya sa gawas ug galamhang inugkontak niya sa materyal nga mga butang; ang lawas nga maoy dayag nga bahin nato mao ang galamhan sa gawas, nga may pagbati-sa-kalibotan, aron makakontak ta sa materyal nga kalibotan.
 2. Ginhawaan sa Dios ang mga buho sa ilong sa tawo sa gininhawa sa kinabuhi aron maanaay espiritu ang tawo isip tigdawat aron madawat niya ang Dios ug isip galamhan aron makakontak siya sa Dios, masudlan sa Dios, ug mapatinuod niya ang Dios; ang espiritu nga kinahiladmang bahin nato mao ang sulodnong galamhan, nga may pagbati sa Dios, aron makakontak ta sa Dios—Juan 4:24; Rom. 1:9.
 3. Ang kalag sa tawo, nga maoy persona niya, ang kaugalingon gyod niya (Exo. 1:5; Buh. 2:41; itandi sa Mat. 16:26; Luc. 9:25), wala pormaha gikan sa usa ka elemento kondili nilugwa kini tungod sa pagtapo sa espiritu sa tawo ug sa lawas sa tawo; ang kalag, nga hinimo sa salabotan, pagbati, ug pagbuot, dunay sikolohiyanhong pagbati nga mokontak sa sikolohiyanhong gin-sakpan; nagpatunga kini sa atong espiritu ug sa atong lawas, nga may pagbati-sa-kaugalingon, aron duna tay personalidad.
 4. Sa espiritu, nagpuyo ang Dios nga Espiritu; sa kalag, nagpuyo ang atong kaugalingon; ug sa lawas, nagpuyo ang pisikal nga mga pamatyag; sa hingpit nga kaluwasan sa Dios gipanag-iyang Niya ang atong espiritu pinaagi sa pag-anak pag-usab (Juan 1:12-13; 3:5-6; Rom. 8:10); gipakaylap Niya ang Iyang Kaugalingon nga Espiritung taghatag-og-kinabuhi gikan sa atong espiritu nganha sa atong kalag aron suropan ug transpormahon ang atong kalag (12:2; 2 Cor. 3:18); gibuhi Niya ang atong lawas nga may kamatayon pinaagi sa atong kalag (Rom. 8:6, 11, 13) ug usbon ang dagway sa atong lawas pinaagi sa Iyang gahom sa kinabuhi (Fil. 3:21; 2 Cor. 5:4).
 5. Duna tay espiritu nga modawat sa Dios ug kalag nga magkinabuhi ug magpadayag sa Dios; ang tuyo sa Dios sa paglalang Niya sa tawo mao nga dawaton Siya sa tawo ug ipadayag Siya; ang pagdawat sa Dios ug pagpadayag Kaniya mao gyod untay kalipay ug kalingawan sa tawo.
 6. Ang Dios mismo gyod untay kalipay ug kalingawan sa tawo, dili ang objectibong Dios kondili ang subjectibo, masinati, ug mapahimuslan nga Dios; ang pagdawat sa Dios ug pagkinabuhi sa Dios maoy kalipay sa tawo.
- B. Gilalang sa Tulo-usang Dios ang ingon niana nga tawong may tulo ka bahin aron mahimong buhing sudlanan aron dunay kahimoan ang tawo nga masudlag Dios ug organicong madugtong sa Dios (Juan 15:4-5; Rom. 11:17-24) aron mahimong organismo Niya nga magpadayag Niya sa pagka-tawo.

II. Sa Hebreohanon ang pulong *gininhawa* sa Genesis 2:7 *neshamah*, nga gihubad og “espiritu” sa Proverbio 20:27; nagpasabot kini nga ang gininhawa sa Genesis 2:7 mao ang espiritu sa tawo, ug kining espirituha mao ang suga sa Ginoo—” Ang espiritu sa tawo maoy suga ni Jehova, / Nga nagsusi sa tanang kinasulorang bahin sa pagkatawo sa sulod”—Prov. 20:27:

- A. Sa pag-anhi sa Dios ingon nga diosnong lana aron dagkotan ang atong suga, mahayagan, masusi, ug magamhan ta—”Kay Ikaw ang modagkot sa akong suga; / Si Jehova nga akong Dios ang maghayag sa akong kangitngit; / Kay pinaagi Nimo makahasmag kog mga kasundalohan; / Oo pinaagi sa akong Dios makalayay ko sa kuta”—Sal. 18:28-29; 2 Tim. 1:6-7.
- B. Ang iglesia nga tangkawan dunay pito ka suga, nga mao ang pito ka Espiritu sa Dios, ang Espiritu nga gipakusgan sa pito-ka-pilo (Bug. 4:5), ug ang atong espiritu mao ang suga sa Ginoo (Prov. 20:27):
1. Nan, duna diay tay duha ka suga sa sulod nato, ang Espiritu sa Dios ug ang tawhanong espiritu nato; sulod sa atong tawhanong suga dunay mas kusganon, mas dako, ug gipakusgan sa pito-ka-pilo nga suga; ang kagamitan sa suga mao ang paghayag.
 2. Sa wala pa ta maluwas, buak nga suga ang atong espiritu; sa naghinulsol na ta, nituo ngadto sa Ginoo, ug nidawat Niya, naayo ang suga ug nisiga na pod; tungod ning duha ka suga dunay hilabihang paghayag sa atong sulod; nahimong usa ang duha, kay “siya nga nausa sa Ginoo usa ka espiritu”—1 Cor. 6:17.
 3. Aron matransporma ta, hingpit gyong buksan ngadto Niya ang tanang lawak sa atong kalag (atong hunahuna, pagbati, ug pagbuot) aron kining duha-ka-pilo nga suga sa sulod nato nga dunay duha-ka-pilo nga paghayag hingpit gyong may kagawang mosusi sa tanang kinahiladmang bahin sa atong pagkatawo sa sulod—Sal. 139:23-24.
 4. Ang tawong nakasinati sa kinadak-ang pagtransporma mao ang tawong hingpit nga nibukas sa Ginoo; moampo gyod ta nga, “Ginoo, hingpit kong bukas Kanimo. Gusto kong magsigeg bukas Kanimo. Bukas ang tibuok nakong pagkatawo—ang akong kasingkasing, hunahuna, pagbuot, ug mga pagbati. Sige kong hayagi. Susiha ko pag-ayo. Hayagi ug buhia ko. Bug-os nako kining dawaton”; sa ingon niini ikasangkap kanato ang kahayag sa kinabuhi aron himoon tang mga tawo sa kinabuhi alang sa syudad sa kinabuhi, sa Bag-ong Jerusalem—Rom. 8:2, 10, 6, 11; Bug. 22:1-2, 5.
- C. Espesyal gyong giporma sa Dios ang espiritu sa tawo; ang tawo maoy sentro sa tibuok uniberso, ug ang sentro sa tawo mao ang iyang espiritu—Zac. 12:1; Job 32:8.
- D. Ang espiritu sa tawo maoy dapit nga niini nagbuhat ang Espiritu sa Dios (Rom. 8:16) ug nagpuyo ang Ginoo nga Espiritu (2 Cor. 3:17; 2 Tim. 4:22).

III. Niingon si Pablo nga gipili ta aron mahimong mga sudlanan sa kaluoy, kadungganan, ug himaya—Rom. 9:21, 23; itandi sa Buh. 9:15:

- A. Ang sukaranong pagtulon-an sa tibuok Kasulatan mao ra kini: ang Dios gyoy sulod, ug kita ang mga sudlanan nga gihimo aron modawat sa sulod; sudlan gyod ta sa Dios ug pun-on Niya; kon dili ta masudlan sa Dios ug dili makaila sa Dios nga atong sulod, wala tay kahulogan.
- B. Gilalang ta sa Dios nga mga sudlanang kasudlan Niya, nga Dios sa kadungganan, aron mahimo tang mga sudlanan sa kadungganan (Rom. 9:21); gipaila sab Niya kanato ang Iyang himaya aron mahimo tang mga sudlanan sa Iyang himaya (v. 23); gikan kining tanan sa Iyang kaluoy ug sumala sa Iyang kaluoy; dili kini mabatonan sa mga paningkamot nato; tungod niini simbahon gyod nato Siya, ug simbahon gyod nato Siya tungod sa Iyang kaluoy (*Mga Alawiton*, #25 ug #26)!
- C. Organicong dili mabulag ang kaluoy ug puangod apan managlahi sab sa pihong mga kahulogan niini—nagpasabot ang *kaluoy* sa dayag nga pagbuhat sa Dios tungod sa alaot nga kahintang nato; nagpasabot ang *puangod* sa sulodnong pagbati Niya nga naggikan sa mahigugmaong pagkamao Niya:
1. Niingon ang Lucas 1:78-79, “Tungod sa maluluy-ong mga puangod sa atong Dios, nga moduaw nato gikan sa itaas ang nisilang nga Adlaw, aron mag-iwag sa mga nanglingkod sa kangitngitan ug sa landong sa kamatayon, aron maggiya sa atong mga tiil ngadto sa dalan sa kalinaw.”

2. Niingon ang Roma 9:15 ug 16, “Kaluy-an Ko ang Akong kaluy-an, ug may puangod Ko sa hatagan Nakog puangod. Busa wala kini mag-agad sa nagbuot, o sa nagdagan, kondili sa Dios nga naluoy.”
3. Niingon si Jeremias, “Nahinumdom ko niini sa akong kasingkasing; / Busa duna koy pag-laom. / Tungod man sa mahigugmaong-kalulot ni Jehova nga wala ta mangaut-ot, / Kay dili mapakyas ang Iyang mga puangod; / Bag-o kini matag buntag; / Dako ang Imong pagkamatimumanon. / Si Jehova ang akong pahat, niingon ang akong kalag; / Busa molaom ko diha Niya”—Lam. 3:21-24:
 - a. Napakyas ang katawhan sa Israel, apan wala mapakyas ang mga puangod sa Dios; gipre-serba sa Iyang mga puangod ang salin sa Israel aron matuman ang Iyang pamatigayon.
 - b. Ang pag-ingon ni Jeremias nga bag-o matag buntag ang mga puangod ni Jehovah nag-pakita nga matag buntag gikontak niya ang Ginoo nga Mapuangoron; tungod man sa pakigkontak niya sa Ginoo nga nadawat niya kining pulong kalabot sa mahigugmaong-kalulot, mga puangod, ug pagkamatimumanon sa Dios; nakaamgo si Jeremias nga kinahanglan tang mokontak sa Ginoo matag buntag, bug-os nga molaom diha Niya, maghulat Niya, ug motawag sa Iyang ngalan—vv. 22-25, 55-56.

IV. Niingon ang 2 Corinto 4:6, “Kay ang Dios nga niingon, Gikan sa kangitngit mosidlak ang kahayag, mao ang naghayag sa among kasingkasing aron maghayag sa pagkaila sa himaya sa Dios diha sa nawong ni Jesucristo”; niingon pa gyod ang versiculo 7 nga, “Apan naa namo kining bahandi sa kulonong mga sudlanan aron maggikan sa Dios ang pagka-labaw kaayo sa gahom ug dili maggikan namo”:

- A. Nagpasabot *kining bahandi* sa versiculo 7 sa *nawong ni Jesucristo* sa versiculo 6; sa Griyego ang pulong *nawong* sama ra sa pulong *persona* sa 2 Corinto 2:10.
- B. Ang pulong *nawong* nagpasabot sa bahin libot sa mata, ang tinan-awan nga ilhanan sa mga hunahuna ug mga pagbati sa sulod, nga nagpakita ug nagpadayag sa tibuok persona; nagpakita kini nga tawo ang apostol nga nagkinabuhi ug naglihok diha sa presensya ni Cristo, segun sa ilhanan sa tibuok Niyang persona, nga napadayag sa Iyang mata.
- C. Tawo si Pablo nga nagkinabuhi ni Cristo sa labing suod ug labing sandurot nga pakigkontak Kaniya, naglihok sumala sa ilhanan sa mata sa Ginoo, sa presensya ni Cristo.
- D. Sa tibuok uniberso walay sama kabililhon kaayo sa pagsud-ong sa *nawong ni Jesus*; labi tang magkinabuhi sa Iyang presensya, labi sab nga tam-is natong mabati ang pagkabililhon ni Jesus nga atong bahandi nga nagpuyo sa sulod—Exo. 33:11, 14 ug nota 14¹.
- E. Iliso ngani nato ang atong kasingkasing sa Ginoo, makuha ang taptap, ug makasud-ong ug makapasumbalik ta ingog salamin sa himaya sa Ginoo diha sa *nawong ni Jesucristo*; tungod niini matuhopan ta sa Dios, modan-ag tag Dios, ug mopasidlak ug mopasilaw sa Dios ngadto sa uban—2 Cor. 3:16, 18; Isa. 60:1, 5a; Job 42:5; Exo. 34:4 ug nota 2; Exo. 34:29 ug nota 1; Prov. 4:18.
- F. Nagkinabuhi ta ngadto sa Ginoo alang sa Iyang diosnong himaya (Isa. 43:7); labot pa, gitrans-porma ta gikan sa himaya ngadto sa himaya sa nagbalay si Cristo sa atong kasingkasing aron mahimaya Siya diha sa tinuod nga iglesiahanong kinabuhi (2 Cor. 3:18; 4:5-6; 5:14-15; Efe. 3:16-17, 21a).
- G. Ang kinahabogang pagkinabuhi ug pag-alagad nato sa Dios “[pagbuhat man sa] tanan alang sa himaya sa Dios” aron hiniusang mapadayag ang Dios—1 Cor. 10:31; Isa. 43:7; Juan 7:18; 8:50a; 17:4; Rom. 11:36.